

摘藻堂四庫全書薈要

集部

欽定四庫全書薈要

集部

皇清文頴卷

四十九  
五十

詳校官候選知縣臣吳甸華



欽定四庫全書薈要卷一萬九千四百五十

集部

皇清文頴卷四十九

賦

五六天地之中合賦

以敬授民時聖人所先為韻有序

劉綸

皇帝御極之元年閭澤澍濡庥徵洊洽珠囊既啟玉燭  
方調披東序之圖不數元包洞極布南臺之策何  
知宣夜周髀猗歟其所謂上參天下貳地登五位



御六乘顥氣所涵及物物解太和所鼓被人人怡者已臣迭稽漢志兼採唐書知陰陽之數定自二中厯象之原通於一合是以術同窺筮還隨豹尾以抽毫技遜挈壺猥進螭頭而受簡賦曰

繫一元之推嬪維三才之有正超鴻濛以開天首狂獐而立命巡河拜洛剖萬象以成苞迎日占星攬四時而爲柄粵僂句之眎範元王叙之以惟欽伊旋毛之負文宓帝受之而式敬於是胚胎既分經緯斯究地天叶配



乎朔南火水訢合乎左右衍母衍子列其方大餘小餘  
揆其候彼一三二四之在前與七九八十之在後固奇  
耦之輻輳亦生成之輻輳惟茲五六之元樞是為中合  
之妙構或著之揲也屬太卜之攸司即觚之握焉繫保  
章之所授爾乃履端於子得統於寅北陸成歲東嵎紀  
春離謝兌乘見朱鳥之夕指坎交艮代覘玄枵之夜陳  
以及長至短至之紉乎四游躡天根而探月窟與夫日  
中宵中之轄乎二表占兔腹而驗烏跋蓋五挈陽樞陽

之純者因而資物六維陰紐陰之老也廼以成民若夫  
次五奠型方之軌次六衷馭世之宜勢則或內以或外  
形則有正而有欹雖五並居中亦中央之沖炁六皆在  
北亦北極之綱維乃羅之五行而異宅即隸諸四仲以  
殊司昔在九峯知洛數之不傳於禹越惟邵子識圖象  
之獨闢於羲嬴之乘除遂爾綜兩間之策元會運世於  
焉釐萬禩之時以故亶

聖惟

天憲

天惟

聖制作契乎銅儀燮理符乎金鏡仰觀俛察覃厥心旋  
乾轉坤根乎性倍其五而天干成重其六而地支竟孳  
萌肇賅闕之首五子按部以分功隙揆統出甲之藏六  
甲循環而布令夫固懸正坐正不足輸其奇抑且天球  
天鐸無以擅其盛猶復區理數別天人酌三統而書夏  
斟四序以繪幽謂維下以律呂為衡不少塵毫之忒即

守敬以晷影為度難言分判之均獨一行之所定惟大  
行之是遵二始開而剛柔旋判二終紀而閏位可循日  
會於天氣盈以五日而絀月會於日朔虛以六日而伸  
是其手即化工非假乎繇首史區之揣測心維太極奚  
煩夫歸奇掛扐之紛綸用能使八政修九功敘周乾規  
折坤矩轉一氣之洪鈞釐百工而時序我

皇於是闢天府以羅觀象之儒登靈臺而集稽天之侶  
致土景於秉圭齊鐘管於繫黍茲蓋法天五之得位實

五極其建之時規地六之成方洵六位時乘之所也斯  
時也神鼇扶柱義馭鳴鞭莫以迎輪抽莢葭因送暎吹  
烟以準律元則鳳儀獸舞以通厯本則璧合珠連五六  
分而天地之中見十一合而天地之道全夫豈非

聖天子之明時以革行健惟乾陶甄百族鎔鑄億年乃  
以發機緘於無始之始而宗法象於先天之先者哉



五六天地之中合賦

以敬授民時聖人所先為韻

于振

道原於天性本於命理足而數不能違道存而器莫能  
竟是以義呈龍馬紫光起而上浮姒界龜書休氣輝而  
四映一為奇而二為耦蓋由於理勢之自然五為生而  
六為成總歸於性情之各正此皆造化之苞符有待於  
聖人之主敬原夫數之所始也太極之先自無而有俄  
動靜之攸分脩陰陽之漸剖圖行而左書轉而右數極

於十章終於九一生二二生三三生萬物非巧歷之所  
稽儀生象象生卦卦統羣爻豈恒情之可究惟

聖人道洽於清寧故妙悟無煩於指授於是理窮其秘  
蘊析其精捫天心而探月窟闡乾符而握坤珍五為天  
之中而地來比之惟其兩也故能化六為地之中而天  
亦應之惟其一也故能神陽之發微而不可見者所以  
藏諸用陰之充周而不可窮者所以顯諸仁蓋不徒以  
綠字朱文演疇而觀象殆將以龍官扈正利用而前民



爾其往來相錯經緯互施一與二三與四五與六七與  
八九與十若琴瑟焉而無虞專壹一與六二與七三與  
八四與九五與十猶臭味也而何敢差池蓋分而言之  
則天以參地以兩天地之撰固昭然其不紊而合而言  
之則奇之積偶之積天地之中乃居然其可知以數而  
言則參伍錯綜適合乎道之則以理而言則剛柔健順  
更協乎

聖之時是以玉燭常調金繩永正鳥火虛昴四序脗合

於尚書賦苦辛酸五味不愆於月令用之著策則道濟  
三才窺以璿璣則功存七政自羣言之日清執師說而  
互競或以讖緯而乖先哲之經或以清談而釀浮華之  
病猗理學之昌明必折衷於

至聖

聖人在上撫於五辰太和保合萬物皆春天生之地成  
之

聖人與之相參皆一中之運用天至易地至簡

聖人與之相似顯大化之彌綸所以鼓腹之民就日希  
光奏松雲於檐棟垂裳之世編珠毓貺迓景福於神人  
若乃螢室豎儒粗知章句虞喜安天之論未涉其藩郤  
雍經世之書鮮窮其緒幸長夜之懸黎比衆星之向所  
究之性率乎命命本乎天植鰲維而永奠法亭毒而不  
愆合義文周孔為

一人道何分於上下滙河洛龜龍為一理圖何別於後  
先允矣哉主圭錫麟符啟炳吾道於億萬斯年



五六天地之中合賦以敬授民時聖人所先為韻

杭世駿

原夫子建天元丑為地柄試推策於二篇實肇基於三  
正帝出震而成艮一元之運皆本中德以流形星伏戌  
而見辰四序之行必於合神而布令析之是名九星統  
之乃云七政數得主而有常道無為而不競撫辰惟勤  
授時在敬奇全耦半積五位以相乘兼兩函三合六爻  
而互應爾其積寸該分課虛責有生成備而變化行神

鬼交而剛柔剖五則一三七九相後先六則二四八十  
居左右探天根者必以為圓蓋之心溯地極者必以為  
方輿之紐馬拳毛而圖浮龜坼文而書授大衍置閏以  
歸竒皇極居尊而用九求天產則音以出清聲唱而濁  
聲酬求地產則管以成陽律終而陰律奏驗空積於忽  
微窮歲差於章部是故自閏逢以至上章隨乾道而錯  
行由星紀以訖玄枵叶坤維而比壽三才鼓盪一氣陶  
鈞天樞之行五五二十五數而俱合地軸之奠六六三

十六宮而皆春元功不宰大化轉淳天之五合於地而  
六氣為之磅礴地之六合於天而五味為之氤氲穹蒼  
於焉發散沆碭於焉列陳海結為錯山融為珍彼夫陰  
陽風雨晦明之殊狀者順施逆受無非穆清之元化酸  
醎辛苦甘之効精者遞生互剋壹皆富媪之元神丕成  
大運綏茲烝民氣結為味六情所以無拂味稟於氣五  
性所以克馴用以歎會通之妙極交錯之文特是財成  
有道輔相有宜五德之當王者尊則利道而節宣者有

序六物之成功者退則和齊而斟酌者有機功先截竹  
令戒愆期繩方應矩徑員象規卦剖分以應候圭測景  
以成儀音有君而有臣律一雄以一雌六管各有同而  
參以二變則七始兼夫八十四調五子厥惟倍而虛其  
中央則四維周夫二十四時和聲繆聲之不忒大餘小  
餘之畢齊於以見聲音之道直與天徹而厯象之志罔  
與律違暨夫玉燭調璇璣定懋對之功以成愆伏之虞  
畢罄惟交泰者大同亦有感者必應天運則春生夏長



秋歛冬藏罔乖夫九紀之宜民生則水潤火炎木滋金  
克備兼夫羣產之勝百神是以有明德而瀆擾不聞非  
民是以有孚誠而悖淫俱靖夫律居陰而治陽原準乎  
五部之盈虛歷居陽而治陰實闡夫六府之歉盛天五  
下降則生數即以開成數之端地六上行則成數即以  
為生數之竟義和占日常儀占月史區占星善言天者  
所以驗於人伶倫作律大撓作甲隸首作算窮其理者  
所以至於命則夫苞符之運固日著於天壤而參兩之

功能不歸之睿聖洪惟

國家之錫福實承

三后之作君鴻業超於古昔學統徹夫天人辨律而發  
徑一圍三之誤則房范之爭盡息調厯而通圓田勾股  
之郵則中西之惑俱泯義仲春而和仲秋作訛成易之  
咸叙南正木而北正火神祇物類之惟寅正方順布六  
字同欣物有苑枯以元氣而消其天札時分消息即方  
寸而施以陶甄是以百福之祥在宥三王之世如春

皇上秉祇肅之純心偉神明之接武以中正者調鈞以  
合同者握矩六官修而五行之氣無愆五福兼而六  
之宜以序泰階之星流符北辰之杓居所饗殄牢醴養  
賢及民厯象璣衡敬天篤祐於是上探五辰之秘遐綜  
六術之傳理參乎大易之大數演乎先天之先或前疾  
或後留大中者默運夫陰消陽息或東盈或西縮有合  
者潛協於右轉左旋媿管窺之末學探三統之遺編洵  
高深之莫賡敢玩索以窮年



五六天地之中合賦

以敬授民時聖人所先為韻有序

劉藻

臣聞兩儀浩博待哲后以財成三統乘除歸元功  
之調變太昊圖呈龍馬聿宣象數之苞符夏王書  
啟神龜再發乾坤之橐籥一奇一耦厥位惟均五  
生五成其機迭嬪起消息以正閏法始容成立章  
部而得天策歸黃帝五家拂異宜溯太初之元四  
序循環共信一行之確顧太初起冬至於牽牛未

精考驗一行附節氣於著策亦屬糾紛謹按漢志  
曰天之中數五地之中數六二者為合又曰天六  
地五數之常也五六天地之中合民所受以生則  
知函三為一統六虛而周流法九實三行十日而  
運用我

皇上參天兩地靜陰動陽得虞書欽若之原履端舉正  
合周易明時之義凝績撫辰左右方圓大衍釐於  
指顧錯綜參伍疇範就其經綸斯固義和之所不

能窺班范之所無從識者也臣心同牖見難讀精蘊之書技止管窺謬誦商高之對自

天授簡伏地悚惶懼無當於敷陳殊有慚夫麗則

緬鴻濛之初開奠高卑而各正偉不宰之神功秩形象而定命主極者理鼓元氣以流行效動者才分全數而縱橫健也順也奇耦以管攝夫陰陽經之緯之易簡實神明於聖敬懿夫天數有五本一以陳地數有五惟二之因由一至九三三所積自二而十二五斯均顧一為

陽之始生其氣初復二為陰之甫判其機未申三四者  
方圓之徑圍求全而未得其半七八者陰陽之少位漸  
老而日趨於新建九而陽已極至十而數終旬調鐘律  
而或失詎能被於生民蓋天地之數止得其一偏而未  
底於中正故天地之情雖不無所合而未彰其化醇也  
乃若全圖之位五實內守六奠其下象卦之姤一仰而  
承一俯而就一與十為之營二與七冠其首三八翼於  
東四九輔其右惟淵居以沖然羅四表而在宥天起一



而終廿五皆本五而積分地起二而終三十實由六而  
推究或乘為八百一十律叶黃鐘或乘為六百四十聲  
符太簇至如終則有始往而必復天以六妙其顯藏地  
以五通其營腠辨六氣之降生滋五味而殷富妙無過  
不及之用孰察其所由然大專直翕闢之能難名其所  
自授爾乃動靜相感變合乘時天降其氣地受其施六  
為虛而五為聲周徧兮歷十二辰而無或遺也六為甲  
而五為子參錯兮符六十日而不可移也二始以位剛

柔二終以紀閏餘總會於中而律呂夫婦純固兮琴瑟  
之兩相宜也五以降為五行生數六以往為五行成規  
置數於中而表裏胙胸和同兮元氣之放而彌也歲功  
以起元紀以推晷曆兮珠聯璧合之無或差池也作訛  
不爽分至以釐氤氲兮緹室葭灰之以息相吹也然而  
覺世為師時憲惟

聖必握符以察璣乃序辰而齊政

聖主乘乾正位凝命協理氣之自然驗存存於成性保

章字典證宿離之弗違太史陳書調風雨而從令惟中  
是準寧用掛勃歸奇之文有餘以歸直溯斟元陳樞之  
盛其存之也惟誠其行之也惟敬不偏不倚

帝則潛孚於無言無思無為

王心常守其至正於是考三正勵羣臣肅百度惠兆民  
統萬物而咸若與四時以皆春中則常貞敷錫彌於兩  
大合則不貳歛福備於

一人其引伸也最微其成功也至鉅定晷影於毫芒較

中星於屢黍上律者不爽其候來備者各以其敘美歸德而不留任一寒而一暑淑風轉處感大造之無私斗柄迴時凜

深宮之作所固知德無弗至有開必先不知天地之本始莫得授時之大全偉矣五六之數燦於卦爻之篇惟大聖人為能用易直探夫一神兩化之前故舉一事而順五行之序純一念而紹萬古之傳歟敬為頌曰在天成象在地成形惟形惟象有數以通惟五惟六天地之

中是曰合之以肇歲功我

皇御極上下合同宥密緝熙會元統宗四正四隅以生  
以成幽贊義策氣動堯堂理數同得萬世之型又歌曰  
皇德無私天地配兮四氣不愆澤汪濊兮建中表正七  
政又兮惟數精微事不悖兮三角八線息衆喙兮弦矢  
割切待進退兮萬物熙熙共茂對兮反於上元億萬代  
兮



五六天地之中合賦

以敬授民時聖人所先為韻

汪士鋐

伊睿哲之撫臨端開天以敷政符元化於大鈞契兩儀之中正觀萬彙所由生聿欽若而祇敬探奧窔於陰陽測端倪於動靜橐籥旋樞權衡運柄竒耦攸分生成交併綜章部紀元之無方會物象滋數之靡竟固致遠以鉤深由厚生以定命時乘以御鴻濛示兆而體元懸象為章鳳職編年而守令原夫律厯相通風氣應候三正

遞傳五紀協懋孕育冥昭包羅宇宙創自容成命於軒  
后彼參伍而錯綜羌成數之可究自一而至九者天以  
垂施由二而終十者地以承覆五與六其居中乃妙合  
而相邁象雖判乎剛柔理不隔乎先後位既得而益彰  
氣以交而彌厚五合六而干支之運周六合五而氣味  
之生茂推溫肅於木金稽永短於宵晝驗沖盈於三旬  
之中審次舍於廿八之宿必義步之不差庶底日以相  
授爾乃孟陬貞位攝提司辰南正北正有秩有倫青陽



始而朱明續西顓行而玄冥因參天之數判生長收藏  
以迭用兩地之數交子復午姤而更新五五相承布為  
七十二候六六遞嬗浹乎三百六旬乘除而分至啟閉  
之按節加減而晦朔弦望之適均履端乃不違其序舉  
正斯無惑乎民歸奇零於盈縮置閏餘以引伸繫周流  
而變動爰往來以彌綸挈乾坤之綱維感翕闢之潛移  
孳萌以逮賅闕大明終始出甲而迄陳揆不爽毫釐溯  
權輿於嶰谷斷兩節以吹之度既均夫厚薄鳴遂協夫

雄雌長九寸而筒十二同心一統律娶妻而呂子子損  
益成規五聲莫尚於宮函陽氣而施種六律以黃為色  
象君服之昭垂十一而道已畢五六而物咸資紛負陰  
而抱陽受中各得其宜中無偏而無陂合不雜而不漓  
五行以協而羣生遂六府以修而百昌滋成乎變化貫  
乎云為術不違天政不失時乘乾出治而百官軌儀釐  
工亮采而庶績用熙乃知河獻圖以錫瑞洛出書而啟  
聖圖則五正位而六之奠於坤者以寧書則五處中而

六之貞於乾者自靖陳疇建極雨暘寒燠以徵休推策  
知來璧合珠聯而互映合三統於一元調八風而諧詠  
宿離不忒恒炳耀於璿樞始和以布彌朗澈於金鏡以  
明六禮之修以復五常之性天神格而地示享兆民賴  
而一人慶仰蒼蒼之正色睇堪輿以無垠越流行而各  
正類金冶與泥鈞區秀頑於五體洽離渙於六親戴高  
未解夫蟻旋之次履厚誰測乎鼇極之輪匪中樞之執  
要孰保合夫貞純矧文明之炳蔚沛渥澤於斯人正亨

衢兮綏泰運握乾符兮闡坤珍六合為家攝紛馳於同軌一中允執肅環共於鉤陳懿夫

盛治游升

聖明當宇百度貞九功叙五緯叶六符舉占星辰調寒暑和風應甘露滑跡接梯航疇盈禾黍協氣旁流芸生得所剛健以運天行照臨而開遐阻五教敷於膠庠六樂諧於律呂立均出度大撓隸首之儔齊政明時典區常儀之侶璣環籥仰合萬寓以同風輪映階平照三光

於東炬夫然則盈虛合軌正朔靡愆隆規邁古成憲鑒  
先務周詳以鎮密亦廣運乎自然出震見離文章標於  
雲漢巽申兌說恩膏浹乎淵泉貞七曜以有常從畢雨  
箕風而適願撫五辰以熙載赫帝車御宿而高懸故合  
夫四海九州之衆無不共戴乎

崇效卑法之全

欽定四庫全書

卷四十九

五六天地之中合賦

以敬授民時聖人所先為韻

齊召南

尋圖書之秘奧知律歷之相因有生成之中數為陰陽  
之適均陽為奇兮自一而遞於九陰為耦兮自二以決  
乎旬竒則三與七俱同列以進耦則四與八亦聯翩以  
陳惟中數之得位見作合之相親天以五兮分一陰一  
陽於十日地以六兮布一剛一柔於十二辰干支合而  
成歲紀氣味合而普化神溯降衷於上帝遍受中於兆

民圖則五連六於坤而奠於北書則五友六於乾而趨  
乎寅揭中宮之土德開子半之陽春雖自然之法象待  
推行於聖人步始大撓算由隸首驗攝提於丑未紀困  
敦於甲戌測弦望於羲娥察縮盈於星宿有中法之可  
稽參五六以考究六以當期歲之寒暄五以辨月行之  
宵晝爻以六紀周流三十六宮日以五遷順布七十二  
候積八百一分即得章數之元歷二十四位仍起牽牛  
之舊渾儀則赤交黃會東角西婁土圭則夏短冬長子



復午姤五加六則十一握終始之根六除五則太一包  
行生之富五其六可符共轂之旋六其五亦合一舍之  
守現端倪於穹壤推開闢於宇宙雖三統之循環總一  
元之相授得中而舉正靡差有合而對時始茂若夫量  
盈虛於辟卦別清濁於神絃聲維五兮象夫五行之生  
尅律維六兮助以六間而具全即有變徵變宮二少原  
無殊號雖列編鐘編磬堵肆第曰在懸五生六則十二  
之簫以製六正五則六十之律以傳鳳鳥嗥喈而雌雄

叶應華鯨鞀磬而宮羽昭宣然而五聲上宮惟宮居天  
五之中位六律尚黃惟黃為地六之中權拱至尊於含  
少肇滋育於幽泉在木角金商之上開未林寅太之先  
中處之數積陽為九九八十一合德之數至亥實十七  
萬七千任方田與粟米極勾股以測弦乘除於河圖而  
有準加減於洛書而靡愆於黃鐘之宮也見天地之合  
焉原夫唱始施生無細無巨五參天以為規六兩地以  
執矩曰負陰而抱陽聿成男而成女俱太極之孳萌共

无妄之物與臧府具而湯液宣性情凝而彛倫敘信為  
本而仁義禮智不虛思作睿而視聽貌言咸舉悟妙合  
之有原識致中之居所天地交矣大君則之黃實冠乎  
五色土兼旺於四時臣民事物同心以為役前後左右  
普照以無私蓋天數至五而生之功已就地數至六而  
成之量方滋合生成於裁成輔相參易簡於覆載高卑

維

聖憲

天維

天啟

聖握珠囊朗金鏡樂如天以同和禮法地以合敬執厥  
中而六府修建皇極而五福併敷五典而帝載熙馭六  
轡而官方正握六符於泰階撫五辰於斗柄調玉燭於  
辰居考葭灰於月令啟苞符以煥八荒在璣衡以齊七  
政赫文明於離照溥恩膏於異命信合撰於清寧與勲  
華而比盛方億萬以斯年賡

一人之有慶

欽定四庫全書

皇清文獻  
卷四十九

五六天地之中合賦

以敬授民時聖人所先為韻

周長發

皇上握乾符基鼎命撫三辰齊七政日月並其升恒星  
雲昭其景慶河洛溯太極之原象緯運四時之柄天自  
一以至九而五執其樞地自二以至十而六順其性惟  
橐籥之昭宣知氣機之協應理推其朔本陰陽奇耦之  
相乘數積於微累百千萬億而皆定占驗有待乎明通  
而分命必原於主敬懿夫健順攸分網緼初姤體動靜

之互根察聲音之迭奏始牙物於黃鐘旋紐陽於太簇  
或積氣於鳳琯克諧或宣幽而鯨鐘可扣天以五施種  
五聲適上夫宮地以六蓐萌六氣皆循其候由居中而  
悉協清寧斯會合而轉旋左右既叶律於音官亦占時  
於刻漏此伶倫有嶰竹之吹而唐帝重璣衡之授蓋以  
龍師紀令鳳鳥司晨大撓始定洛下初陳六甲運日五  
子分辰知十一之胥會悟參兩之相因五五則二十有  
五行其數六六則三百有六紀其旬推章中統中之悉



備識元法通法之皆真總轉環而起子當賓餞而惟寅  
窺端倪於兩大勤率作於兆民爾廼仰觀天象俯察地  
維驗諸盈縮考厥疾遲按木火金水之節定東西南朔  
之司立一閏再閏之法准三年五年之期會甲子於一  
元非宣夜周髀所能測建斗柄於三正詎霍融姚信所  
能知居明堂而頒朔統薄海以明時於是我是

皇參贊兩儀臨御萬姓手挈珠囊胸羅金鏡河海晏清  
星躔輝映五為奇而五德之運不窮六為耦而六合之

周無竟原對待以相衡亦流行而不競苞符之蘊畢宣  
主宰之精皆孕惟一中之脗合無分斯萬物之權輿自  
正理通邃穆以顯微睿澈神明而作聖原夫一元真宰  
萬彙化醇三才之並立無間一氣之摩盪皆春列五緯  
於五方而宿離不忒運六虛於六幕而化馳若神始窮  
理以闡朕兆繼倚數以測彌綸以五啟六生成罔替以  
六承五流行日新此所以開窔奧於千禩而仰作睹於  
一人也是以蘊自胚胎積自累黍五六適得其中天地

遂順其序溫肅協乎春秋雨暘調夫寒暑履端則五事  
契於五行審音則六律生乎六呂數計而燦若列眉燭  
照而洞如觀炬五位時行六階敦敘泰運聿新宏綱具  
舉為能效不息於健行而凜無逸以作所廼知示簡惟  
地示易惟天宅中立體環合無偏仰蒼昊而覆幬自廣  
披黃輿而持載克堅探神著於犧易占靈莢於堯年驗  
初陽於黍谷探精義於瑤編與銀甕金車而並出偕赤  
文綠字以俱傳當執中以歛福見翕合以乘乾無不頌

萬年有道之祐而直溯乎一畫演卦之先

指佞草賦

以生於堯階有  
佞必指為韻

萬松齡

繫聖人之首出見瑞草之舒英質葱龍而秉直性荏苒  
而含貞懷觸邪以挺幹用樹德而抽莖鬱鬱承陽以煥  
采亭亭對仗以輸誠蠲忿難齊矯若薰蕕罷異迎涼莫  
屈居然臺閣風生爾其毓秀赤墀騰輝丹牖經霜霰而  
不驚培雨露之獨厚願葵藿之同傾鄙菰藿之非偶萑  
蒲搖而不止兮茲無浮動之心莫英落而復生兮茲有  
神明之守羌既抱此內美自許無私乃肇錫以嘉名從

束希有原夫真靈獨尚精炁相於得乎天者獨也正遷  
其地而弗能居不受溝澮之潤澤無取塵土之吹噓玉  
砌初萌已思攀檻金鋪乍拂早切引裾特立本無儔未  
假蓬蔕之助密孤根還可用不妨槐棘之交踈於時庭  
燎初昕更籌未罄臨軒之藻黼熒煌詣闕之簪纓綿亘  
官師岳牧分猷以告成功水火工虞竭志以邀清聽惟  
茲羣后一德相孚詎有孔壬偏長克勝此草當門煜如  
照乘無微不燭如響斯應若車之南向眎其鉞而方隅

以分類斗之北居準其杓而次舍有定不聞當路而妨  
賢乃見無言而指佞蓋道莫高於古帝勲莫盛於唐堯  
感中天之正氣長拔地之靈苗斷不從風而靡迥殊厥  
草維天夾陛濃鋪儼青蒲之自伏凌空直上同白筆之  
高標宜其發華滋而獨茂敷正色而不凋顧惟人本難  
知草為弱質誠則能明名宜附實一莖雖切於效忠百  
卉無從而致詰為賢為佞安知所指之是非若曳若搖  
孰辨斯人之得失是知秉心則哲乃昭瑞應於伊耆屬

物有神兼識靈根於屈軼謂小草之足觀惟真鑒之可  
必我

皇上德隆九有業朗三階任賢惟當熙績允諧封菲不  
遺而羣情自獻茹茅盡拔而大道與偕瑞木華平川嶽  
之珍畢至九莖三脊海山之貢無涯所以擢秀瀟灑廊  
掄材皆杞梓棟梁競構其宏材柱石特隆於金匱滋蘭  
樹蕙悉吹藝苑之芳椒佩蓉裳共志文林之美

宸衷以睿知有臨百爾以忠誠受祉是以羣材悉勵咸



知匪懈於當官即使瑞草重榮不將無佞之可指也哉



指佞草賦

以生於堯階有  
佞必指為韻

朱荃

遡中天之盛治肇瑞草之嘉名傍赤墀而競茁依阿閣  
而荒生抽直幹之亭亭居然白筆布芳蕤之纚纚不數  
華纓既通靈而獻瑞亦稟性以懷貞方竹箭之凌雲彌  
彰勁節比葵心之向日轉益丹誠爾其敷英列陞布葉  
重階初萌碧穎漸挺丹莖茅三脊兮難與共花四照兮  
非其儕獨有廉泉堪資灌濯但逢介石合與差排不藉  
吹噓自仰涵濡於帝澤長徵弼直爰昭瑞應於天街當

夫獸闢初開龍樓乍啟九棘連行三槐對峙瞻肅肅之  
衣冠集煌煌之劍履被紫懷金之輩並詣雲間垂紳搢  
笏之倫同趨瑤祀乃斯草之效靈觀僉士而必指瓊苗  
偃處紛矣如林碧筍翻時直哉如矢靈根有覺初不謬  
於毫釐小草無心亦何私於彼此故宜名登瑞牒兆叶  
球圖與薏蒲而並出偕蓂葉以相於不事蔓延羞同葛  
藟依然特立絕少葭莖經疾風而逾勁零嚴霜而不枯  
如將盆盎盛來便疑丹匭倘遇封章伏處即是青蒲既

正直而不撓亦縱橫而固失苟回邪之稍萌將指斥其  
可必賢士遇之而賞心佞臣見之而增慄澄仕路以肅  
清代天家而品隲惟茲上瑞實昭格於放勲乃播嘉聲  
永流傳夫屈軼是知祥為德感氣以神調草昧既開獨  
尊古帝欽明作照首頌唐堯括以知人本在天心之曲  
鑒靜能觀物用孚靈草之清標冠百卉以當階遠辭施  
榮承千官之委佩如緝蘭椒用能敘班聯之濟濟隨罷  
使以昭昭今

天子懋德升賢並觀兼聽仰藻鑑之精瑩運神明之決定當幾之括既徹微而洞幽先事之防惟去讒而遠佞故臣工悉化其偏私而物類亦昭其瑞應爰有朱草生庭嘉禾被畝連跗之木擢秀於華池百莖之著揚蕤於郊藝惟大化之覃敷致羣情於醇厚賢良之彥咸效命而爭先便佞之夫亦格心而恐後縱屈軼之羅生指清班而何有

皇清文穎卷四十九

欽定四庫全書薈要卷一萬九千四百五十一

集部

皇清文頴卷五十

賦

秋郊大獵賦

梁詩正

惟

聖作觀乃文乃武智勇天錫遠邁前古道洽化淳覃敷  
下土繼志述事適追

皇祖緬惟

謨烈之垂於鑠蒐苗之舉乘農隙而詰戎兵歷周原而  
臨津圃時巡經五十餘年賓服暨四十八部匪徒樂乎  
從禽實以資乎講旅爾其寒蟲作語殘蟬咽鳴域中氣  
爽塞上秋清開廣野而百里聳疊嶂之千層露點山楓  
丹黃成幄潦收石澗清冽無聲草淺獸肥則儻儻而俟  
俟風高馬健斯龐龐而駟駟撫涼晨之方屆應令典之  
時行

天子廼簡爾卒徒卜焉允吉六師載陳



萬乘以出旌幟飛揚騂騏走駃循一逕以逶迤喜百昌  
之茂實雄關瞻眺則馬上賦詩廣陌詒諏則林間  
駐蹕戒金吾之漫驚無害我田禾

詔賦額之量蠲克知吾民恤遂乃縈紆沙磧攀陟寵從  
颺凌百谷霧隱三變奮

一人之神武擁千衛之羆熊左右賢王負弓弩者從公  
於邁渥洼名產效服襄者我駕既同行聯雁翅勢總鴻  
網森鸛鵲陣之圖法嚴赤白羽之軍容綺霞耀色皜日

臨空壯赴桓於七萃訖聲教而四通則見夫野豕連羣  
黃羊彌陸雉兔星流麀麇波屬始則環林箐以成圍繼  
乃驟岡巒而爭逐任駭獸之馳奔臨

至尊而懾伏惟時我

皇佩烏號挾夏服澤射麋林即鹿蹂躪封豨捎接鷺鶩  
鷹逞攫拏盧供呼蹴風翎掣耳霜鋒睖目灌莽叢搖飛  
鳥頸縮看一發之威張仍三駟之恩渥受殪者流血朱  
殷逸園者驚魂觥觥用循狩野之文藉供登俎之肉陋

上林於漢武嗤七澤於周穆於是大綏罷抗上殺紛馱  
計鮮數獸牲牲孔多兩牡之從莫比三狐之獲奚過  
特賞聿酬乎虎旅餘恩兼逮夫鸞坡刀割火燔鱗次駢  
羅厥儀以備其禮則那此

聖主載覲

耿光非侈雄風之賦而從臣欣傳盛事欲賡吉日之歌  
者也夫

聖烈克善繼繩

大孝尤垂永久有事武功敬將

文母黍禾低拂扶輦塋間幕殿高張問安門右升幔城而怡

色笑既豫以康視御膳而晉肥鮮維旨且有方閱秋中再經重九受琛呈艾納之香介壽薦菊花之酒雖大漠其偶臨徵

尊養之彌厚臣職司橐筆行効服裝數奉清塵於豹尾獲瞻

偉績於龍驤力乏策鞭彌慙短馭才非作賦雅慕長揚  
不諳糴氏之經未嘗止殺曾讀相如之疏頗鑒垂堂竊  
綢繆於未雨願儆戒乎作荒凜登危之明誠懷御朽之  
良方永為後式廸惟

前光胤曰時畋兮奉祭祀戒不虞兮習戎矢考舊典兮  
禮經煥新猷兮

天子仰

丕烈之於昭兮奉

慈顏之有喜涼風戒塗兮

法駕北指雲罕兮輕移塞垣兮戾止羽林夾扈兮連鑣  
番部來同兮結軌大園兮周環沿谿谷兮邈迤屹如山  
兮逝如水百獸匿兮深林裏月弓星礮兮惟

君之使落飛鳶兮殪大兕法湯仁兮網廼弛大庖充兮  
娛

慈寧旌門錫兮勞將士簡軍實兮柔遠邇苞桑永固兮  
千萬紀

聖駕東巡

盛京恭謁

祖陵大禮慶成賦有序

張鵬翀

皇帝御極之八年秋七月奉

皇太后鸞輿虔詣奉天展謁

列祖陵寢逮及從龍諸勲戚一體酌奠禮成

御崇政殿

頒詔加恩用光

祀典周巡藩落順時獮狩冬十月

車駕還京師臣備員講官職司

記注竊以我

朝發祥長白創業東京中原定鼎以來丕顯丕承

祖功宗德實式憑焉我

皇上治洽重熙孝隆繼序茲行也繼

世宗之志述

聖祖之事煌煌乎國家之鴻儀鉅典不可無述而誌也



不揣謏陋竊采成周雅頌之義廣漢代上陵之辭  
而為茲賦謹拜手稽首颺言曰

猗與禕與我

皇清之受

天眷命而光宅四海也蓋積功累仁久矣默孚於

真宰值明祚之將衰猶玉步之未改既馨聞乎上下益  
懋敬而無怠宜其龍飛鳳翔蔚然炤耀乎符采是知萬  
邦之翼戴維新

列祖之詔謀斯在比有邵之肇興同后稷以無悔斯  
聖子神孫所繇瞻拜

橋陵而永懷於億載也

聖皇奉圖受玉率

祖攸行孝思隆於下武濊澤洽乎羣生永思維艱既克  
肩乎宏鉅陟降左右每仰瞻乎穆清單厥心而肆靖儼  
夙夜以儲精水千年而一色山萬歲以同聲

列祖之園陵在望

一人之祇謁惟誠歲在癸亥月躔庚申閭風應候蕭露  
零晨恭侍金輿喜映

慈幃之色笑遙迎玉輦長街

聖主之恩綸萬乘啟行於北闕兆人歡躍乎東巡爾其  
原隰昞昞黍稷蕤蕤近郊則烟靄萬家遠障則晴巒千里  
城頭之曉月如弓塞上之晚霞若綺貔貅列帳擁星廬  
而刁斗森嚴虎落三邊動金鏡而弓刀奮起時巡翠帽  
瞻雲日以就

聖人藩服旃裘涉風沙而從

天子舟惟玉以及瑤想當年之跋履峯明納綠翻茶火  
之旌旗塞接銀潢壯星辰之壁壘雕弧射鹿駐輿而先  
獻

慈寧玉醴浮觥率舞而同賡燕喜蓋桂輪將滿適當  
萬壽之辰而海屋重添正應九皇之紀依

聖母以承歡偕

中宮而受祉是則

祖宗之篤祐永綏

陵寢之垂庥未已者矣盱衡列塞控馭九邊時孟冬之將屆

聖駕廼蒞乎奉天王迹所肇興京在焉英額之門屹若隆恩之殿巍然三百里內

三陵蔥鬱而相連羣工于是駮犇走執豆籩萃萬國之懽心冠裳翕集煒五陵之佳氣鸞鳳相鮮寶劒玉衣緬英姿之颯爽金戈鏤馬挺壯氣以廻旋灑落君臣至契

信符乎魚水馨香俎豆精靈不隔乎重泉此

聖主曠世之仁爰及苗裔而

興朝無疆之恤有永萬年者也祀事孔明典禮備舉  
御玉殿以慶來章

降綵綸而隆錫予蠲租賜復惠深京邑蒸黎進秩酬庸  
榮被中朝簪組是皆繼述之大端舉運量於

皇衷而率循乎

聖祖于焉周覽風土徘徊舊基燕衍而勲戚咸集賜酺

而邦人宴娛樂遍五行之舞歌闋三侯之辭吾

皇于是畢然而高望穆然而深思緬葛燈之舊制撫茅  
土之堦茨能不懼後人之增華而踵侈墜前王儉樸之  
留貽乎松山杏山過戰征之故壘髣髴乎躬擐甲冑櫛  
風沐雨而驅馳後之人其可忘創業之艱難守成之不  
易而隳茂世之洪規乎蓋駿命靡常天難諶斯自古聖  
王防險戒逸居安思危昭示來茲昔遼左之一隅聿興  
鼎業今金湯之萬里不限華夷雖曰既安矣既治矣能

不終固之又固之此我

聖皇所為凜若春冰不敢耽深宮之燕佚炯傳寶籙如  
聞夫

列祖之嗟咨者也惟

帝眷懷是咨是度長白峩峩高山天作四郡既開三韓  
漸拓入編伍而旂分聽指揮乎部落望祀有秩懷柔是  
若靈爽盱蠁豐功懿燦雲雷屯險溯草昧之經綸日月  
光華粲隆平之禮樂是以陪京駐輦致觀風問俗之殷



行殿捧觴備愛日娛

親之樂揚旌駸駸而劍舄流連弭節紛綸而威儀有恪  
誠足以荷

靈貺之綏成稱哀對而無忤豈止眺山川之雄奇玩物  
產之饒沃海波滉漾呈徑寸之明珠地氣華滋闢三極  
之上藥而已哉彼夫漢高豐沛光武南陽太原啟聖上  
黨興王皆歸功于創建數疇昔而慨慷逮易世之多故  
每纏悲於露霜獨我朝之

聖聖相授實遠邁乎漢唐吾

皇嗣統之八載臨躍龍之舊鄉百年故基問遺老其既  
盡雲孫累葉調玉燭以彌光豈非古今之僅事而  
聖代所獨彰者與矧吾

皇之繩

聖武而法乾行也卜歲叶吉練時孔良百靈呵護十駿  
騰驤宜雨而雨宜暘而暘初發而清風披拂旆將廻  
而瑞雪飄揚天人協應百福千祥猗與吾

皇將何以敬

天庥而答

神貺乎漢家猛士守四方蓋臣念祖扶周邦願吾

皇帝勤側席無遺忘忠言苦口利用嘗伏蒲悃欵排天  
閭願吾

皇帝咨交儆無怠荒不矜不伐式夏王不邇不殖儀成  
湯憂叢脞勅幾康願吾

皇日慎一日師虞唐不休哉吾

皇敬慎常若此燕

皇天昌厥後萬年景運有不昭融

祖德靈長哉小臣忝列赤墀之下綴青瑣之班雖未奉

屬車在後如長依玉殿中間昔聞玉帛初歸鑄九州而  
作鼎今見金甌永固羅四海以為闕仿漢上陵羽衛未  
妨農扈法周巡狩車攻逮及禽頒願奏回鑾之曲徐看  
振旅而還映日成文敢次從臣之嘉頌挾天作賦惟循  
聖藻以回環重曰

聖皇繼體大承乾兮仁風暢普膏露溥兮開基奠鼎溯  
艱難兮

橋陵在東鏘八鑾兮禮隆樂備鬱封巒兮永思追孝履  
霜寒兮勩勤績武敞游盤兮

六龍巡幸兆人歡兮荷璫被毳仰榮觀兮震威懷德拱  
堯壇兮萬年嗣服永奠安兮



聖駕東巡

盛京恭謁

祖陵大禮慶成賦有序

竇光鼎

乾隆八年秋七月

皇帝時巡於東祇謁

三陵續舊服也臣聞之孝經曰昔者明王以孝治天下  
故得萬國之歡心以事其先王王者家四海子萬  
姓民康物阜備膺咸有所謂馨香無讒慝也我

朝肇基遼陽奄有區夏

聖聖繼承肅將祀事

皇上孝思惟則聿繩厥武奉

皇太后而東肇裡迄用有成  
盱衡周浹神人洽暢錫類  
推恩懽呼雷動仁孝之義備矣  
微臣窺天測海仰  
見萬一拜手稽首爰獻賦曰

於皇時

清



祖宗濬哲欽明苞四葉之歲蕤殷

二聖之光靈綿瓜瓞於東土陶復穴而靡寧荷帝耆以  
啟運規方輿而作京於是我

世祖乃仗大順揚天聲掃畔換蕩撓槍敷

皇極以創業拯蒼顓之類綱欽若

聖祖離明重宣哀對化洽緝熙心單觀耿光於  
列聖識王業之開先溯鍾靈於遼瀋加崇樹於  
陵園薦明德以升馨推燕及於

皇天仁風所被羣生靡然窮髮以北越裳以南陸訾水  
慄而來賓焉有不享其贄幣者六十一年亦越

世宗奉藩底績駕言徂東祭告是飭泊乎踐祚康田功  
而無暇逸者十三年如一日惟我

皇上累熙洽於世業承顯懿於

先德瞻堂構兮依然儼羹牆兮髣髴凜陟降以保明永  
夙夜而祇栗者蓋八年於茲矣於是肆觀羣僚廣沛

綸音宗伯議禮天官協辰敕堪輿使護野兮屬方神以

梁津戒飄風以清道兮名凍雨而灑塵然後建辰旒結  
翠蓋曳雲梢張霓旆飛九旂走七萃載駟隱齊沛艾奉  
慈寧而御金較發

皇輿而策天駟綦綏蠖略濶庠穆纚焱焱煜煜魚頡而  
鳥盱兮雲駟華芝之旖旎也總總搏搏雷轟而電掣兮  
千乘萬騎之雄詭也排閭闔而啟行兮挹雲山於縹緲  
陟高行之崿嶷兮超紆譎之浩淼望舒夾轂而飛光兮  
羲和迴鞭而流杲水后傳警而躩跣兮山靈稱蹕而窈

窈白虎右踞而軒翬兮青龍左旋而天矯夔魑潛形於  
黠黠兮猶狂聞聲而蹶倒於是總六校用三驅橫干將  
仗鉞鋸彎烏號發天弧妙更羸踰蒲且振雄虺掃封狐  
跨野馬踰距虛格奔兕攄飛鼉閔雲羅震地廬淫淫裔  
裔轆轤輻輳指顧倏忽屬車充盈解罟開網振旅天行  
威讐荒徼稜嶭王庭旃裘魑結之長稽首稱藩獻琛執  
贄來享王於塞下者蓋竭其款誠然後躡邊月御朔風  
緣林薄披蒙茸渡析木而觚箕尾兮駢結轡乎天東瞻

高山而履夷行兮，緬荒作之神功。爾廼長白崔嵬，巫閭  
龍嵒，欲歆鴨綠磅礴，混同滙以天池之奇。亘以地軸之  
靈蟠，以螭龍之窟。拏以虎豹之扃，及乎烟雲卷舒，揮霍  
出沒，霅然陽開，帥爾陰閉。風雨之所和會，日月之所旁  
魄，雷霆之所鼓盪，星斗之所伾伾。霞駮波沕，蒙合霧集，  
蔥蔥然鬱鬱然擁。

帝陵而孔固，挾王氣以成霽。於是大丙弭節，六軍銜枚。  
鵷班匐伏，雉尾中開。

乾情顧矚而愉怡禮官奉御而徘徊屯虹旃於輦路排  
仙仗於瑤階重闥寥窅以櫛密茂樹蒨鬱而氣佳乃搜  
逮索偶序賢擇能相與澡心滌慮澄神斂精返聰明於  
蠖濩之室清徒驥於錙壇之宮靡薜荔以為席兮吸瓊  
芳之露英侔神明以為資兮契元符於杳冥廼詣

永陵開運穹崇包孕元氣吐納鴻濛有邠館荒度之基  
焉廼詣

福陵天柱翠沓跨躡百貊橫被六合有岐陽式廓之規

焉廼詣

昭陵閼宮雲竦隆業居尊蒲蓮星拱有豐垣攸同之治  
焉作求世德來許昭茲元祀惟稱百禮孔時麾葩瑤舉  
洪頤錯白茅班黃彛潔蕝醢修明粢割五牲效三犧上  
卿贊采太史誦詩庶官獻幣六祝陳辭揚戡定之赫奕  
兮溯謨烈之燕詒

天子穆穆以駿假兮顯相駿奔而宗祈爾乃尚氣尚臭  
於陰於陽德產畢致神保是皇進觶醵之圭瓚和泔淡

之秬鬯嘉粟無違普淖斯饗芟芬旁融樵蒸焜上蕭薌  
升兮燦訛焄蒿感兮悽愴於是我

皇上遊神於漠合氣於幽心存色授目想形留流水汨  
汨崇山矗矗禹甸昉昉周原膺膺此我

列祖之所開疆而拓土也築室翼翼四方之極軒黃熊  
墟祈帝陶邑此我

列祖之所正方而肇域也琬琰天球刀訓河圖斑陸上  
下光越璠璣此我



列祖之所闡珍而握符也黼純席几繪繡繽紛清曜華  
燭如生如存此我

列祖之所衣德而紹聞也環顧百僚濟濟蹒蹒東甗西  
劉左右奉璋此我

列祖之所譽髦而思皇也睠言萬姓林林總總耕水耨  
火助我染盛此我

列祖之所惠懋而救寧也精屬屬以往來思勿勿以微  
探耳返聽於閭寂兮忽愾乎其聞嘆目收精於廣莫兮

羌僂乎其有見洞廣開兮帝閭紛其乘兮白雲

靈皇皇兮來歆吐瑞氣兮氤氲暗藹兮褊褊殷靈風  
兮冲天乘太清兮降監委繁祉兮如山於是

皇儀暨孝思展羣歡洽式穀戩報地靈所自鍾遡天潢  
所由演懷柔神祇望秩山川諸侯三公所視維虔禋燎  
燁煬上致高煙碩麟含輝黃龍吐炎五精歆馨而顧德  
四靈效順而攸安廼蒞盛京雲護日邊九市開場萬家  
起烟居靡近遠人無後先黃童奔走白叟往還士女頌

斌衣冠聯翩莫不動容發聲引領駢肩詠盛德而獻讜  
言歌曰

帝之來兮雲飛誕我祀兮聿歸望龍旂兮袞袞懷吾人  
兮覲德輝

天顏咫尺兮其不違

天子顧而嘻曰咨爾父老兮殷予相望永言不忘兮惟  
梓與桑予其夙夜兮恒勤思於平康廼鳴和鈴遵通衢  
敞華闕啟

宸居有嚴崇政有翼篤恭左宜文德右昭武功闕睢麟  
趾永奠清寧閣開翔鳳時乘

御龍藹藹周親濟濟臣工趨丹陛而近日伏玉墀以呼  
嵩爾乃鼗鼓殷雷華鐘發鯨孤竹間奏空桑和鳴列八  
佾抗五聲盡六變齊九成韶武隱輯鈞天鏗鎗傑侏尨  
離并附雲英氣盛化神既和且平於是命膳夫開瓊筵  
御嘉珍窮芳鮮沛宮父老把酒極驩南陽故舊載笑載  
言於焉歌豳稼穡艱難躋堂稱觥萬壽祝焉於焉歌雅

泉原庶繁酌匏執豕君宗頌焉當斯時也雲變隼兮雨  
滂沛恩鴻溶兮澤汪濊

綸綍頒兮車書會謳吟同兮雷聲磬聒乎寰中馭沓  
乎闕外羣臣醉德揖讓而退

皇上觀衆庶之說豫覽福應之繁昌仰維

鴻烈雍容揄揚控天地以選義綜古今而成章萃人文  
以化成麗景緯而道光暢皇風於億載被金石而流長  
文德既昭武節是宣選徒大閱戎經申嚴赤羽日臨白

羽月懸戈鉦星羅鎧甲霜寒次和樹表牙旗高塞鷹揚  
陳鉦虎虓張峯浸淫楚部陣勢踈踈鷺鷥魚麗翼翼鮮  
扁變出奇正體合方圓山苞川流地吸天旋然後收軍  
會衆翼翼綿綿若雷收風舉翕赫乎數百里之間時則  
黑精司正律中應鐘虹藏凍地日次尾中萬乘廻薄千  
官扈從仰瞻雄關峽岿嶢溟俯臨滄海烟恬波平扶桑  
隱映炙轂上征巨靈鼉鼉冠山而興神龜翕忽負圖而  
迎返旆揚鑣還我

神京假於

太廟告厥成功

臨軒穆穆

問寢雖雖可不謂元德之盛而至治之隆乎而

聖主猶昧且不顯夕惕朝乾飛聰馳明兼聽並觀撫茲  
兆庶

祖宗之臣念茲釋茲衣食之源黃壤白墳何以奠之插  
雲渠雨何以勸之祈禱禳災何以先之流火授衣何以

瞻之惟小人之所依思無逸之所嘆審天聽之在卑知  
配命之維艱是以明德慎罰宥災除青常畏民生之傷  
也取財用物賦政任役常懼民事之荒也匹夫匹婦不  
獲自盡若已納之於隍迨至陶甄無遺雍熙有象老有  
所終幼有所長窮有所歸廢有所養風協五日雨依一  
旬牧人夢魚桑女聽禽魯孫之醴洽祖農夫之鼓御神  
京師之錢貫朽太倉之粟因陳守閭閻者食梁肉為吏  
者長子孫家滌瑕穢之俗人生廉恥之心上絕奇麗而



不御下抱元化以含淳我

皇上於是泊乎無為愷乎樂康譜虞絃於揮桐聽堯仁  
於擊壤講德於昇平之圃登功於穆清之堂問道於崆  
峒之上考治於汾水之陽使君子小人奕世無疆賢賢  
親親樂樂利利咏歌前王於不忘者如水奔海如雲從  
龍如風偃草如網繫網此真所謂我

皇上合萬國之歡心以事

先王也若夫登封太山降禪梁父徒篆功而紀瑞無關

敬親與尊祖由今揆之亦猶棘林螢耀而與夫尋木龍  
燭也復安可以語哉臣忝預載筆之末推本孝治奉揚  
仁聲敢敷陳其事而美盛德之形容頌曰


天作高山啟王會兮

列聖篤生信厥對兮光靈在天杳旭卉兮惟日再中司  
厥契兮聿追來孝承大禧兮民力普存融芬懿兮

神其攸歆駢獻瑞兮仁恩滂洋渾中外兮垂衣端拱式  
則大兮明良賡颺熙帝載兮一人有慶兆民賴兮

聖子神孫麗萬世兮

皇清文頴卷五十



總校官庶吉士 臣 張能照

校對官檢討 臣 王鍾健

謄錄貢生 臣 蘇曰柄

欽定四庫全書薈要

集部

皇清文穎卷五十二

詳校官候選知縣臣吳甸華



欽定四庫全書薈要卷一萬九千四百五十二

集部

皇清文穎卷五十一

詩

樂府  
皇雅四篇

有序并上表

葉方藹

臣

方藹頓首再拜言伏惟

皇帝陛下赫然一怒隴右閩南相繼底定叛者柔服復  
為良臣二方之民如無兵革竊謂故典所載討亂

成功者有矣必右翦左屠殲其類醜艾薙而溘崇  
之甚者禾苗稊莠不擇而鋤大難雖平民氣破傷  
征役怨咨之感未能盡息豈如今日初無鯨鯢之  
築京觀之封轉危為安易亂而治致效疾速捷於

景響

臣侍從

殿廷命將出師之日親聆

德音巨憝而外勿僂一人倒戈來迎許以不死勤懇諄  
諭至再至三以故至誠感孚豚魚知格方之古昔



惟舜舞干羽而苗格文王因壘而崇下庶幾近之  
史官載筆宜有紀述宣示遐邇伏念臣待罪翰林  
以文章為職業而謗非固僊無以稱揚德媿竊聞  
詩有六義在朝宜雅故有六月采芑車攻吉日江  
漢常武諸篇所以誌武功昭文德示後人以則倣  
俾繼序思不忘臣輒不自揣著為雅詩四篇雖不  
能如尹吉甫之萬一亦不敢為相如班固符命貢  
諛之詞因事述言多所挂漏但區區之心欲令天

下萬世知

皇上仁勇天錫超軼前後更祈益加勤勉載沛威恩使  
反側之徒旦夕殄滅以塞臣庶之徯望臣之此詩  
得附

寵靈以不朽誠不勝大願臣方藹昧死上  
涇丘受降也

涇丘崇崇安定龐龐

叶龍

我有虎臣以折以衝老羆臥

矣貉子曷過矣以固我圉以靜我野叶澹矣

安定洋洋涇丘攘攘我有虎臣化為豺與狼誰其飢之  
俾饑而噬矣誰其條之俾颺而逝矣

羣恒其兇羣餌其誘賊我主師戕我盧首民人毒痛甚  
熱於爐甚溺於塗以號以呼呼天無辜

帝念斯庶孔顛奚釋乃命臣海惟爾作朕弼爾惟一德  
太清之緯實眷西顧往綏殘黎式完頸脰

叶度

彼携者子始心非貳大敢逋播其引領望貫爾承命勿  
替往與之渝賊可坐而獮往與之叛衆可招而獲

海拜誓師次於秦郊我馬踴踴我士囂囂孔武且豪搏  
賊以教有兇有孽將螫將噬我旆方設則已顛蹶

乃傳其壘元臣是臨弛我武刑諭以德心往能思服其  
保爾族待女以不死否則孥僇悔可邀禔吝則終辱隳  
膽束軀惟爾之福

唐子知歸崩角務面敢怙而抗爰順以弔叶霽臣罪不

可赦刎頸以謝隴頭之水流聲鳴咽元臣止之女無庸

自絕

皇帝慈仁其度如天曰恐以一夫俾百族顛連維國有

恒憲維予有殊恩

叶殷

洗女瑕疵濯女垢癥女宜自圖

以蓋厥愆

其危既安如乳獲母戈鋌倒載衅甲臥鼓昔也衡命衆  
號以咷今也輸誠衆謹以嘒昔也負隅有壘猶墟今也  
革心卧起于徐

帝念秦隴噢之咻之綏彼攜貳輯之柔之非我受降

叶紅

為民受降應地之坤順承含弘

叶紅

非我宥慝為民宥

慝雷雨之解百穀之澤

薄言震之隴右肅清元臣蒞止疆場克寧我民有父母  
我

君有臣喻彼飛鵠曷懷好音上帝式臨無遐爾戎心

涇丘十二章二章章八句四章章九句四章章  
十句二章章十二句

關隴平隴右也

關嶺茫茫隴流湯湯紆餘逶迤崢嶸嶮巖面蜀肘涼輔

車相將狡焉啓疆震驚我方

關嶺兀兀隴流滔滔彼涇啓戎乃蠢茲蠢賊為虺為蜴  
為螟為螽叩首張臆助逆抗有德如蝟之集如猳之突  
涇原既靖乃羣賊大震睢睢盱盱延旦夕之命

帝命臣海為隴民徙灾

帝命臣勇師自西陲

帝詔臣海女速涉阪出彼朝那為勇軍援犄之角之沓  
之蹙之除民之慝俾婦子其適尚嘉乃之績

海涉河涇言騰灞漥秦山矗突嶽崎隴阪踰邠越涼飛  
旃揚旆扶輿猗靡雲罕綵繚雍部阻長敢憚痛瘡式遏  
寇虐以寧爾室家

叶歌

勇自河西銜枚疾指來從酒泉轉戰天水矯矯虎臣一  
乃心力推堅挫鋒盪彼蠱賊兵車百萬洶洶雷震橫會  
方州為行為陳

叶陣

東西合圍賊在釜底

叶低

其智斯竭其魄斯奪勇率其

麾崖誅谷討曰臣思克曰臣進寶赴赴奮武為



王干城勇實帥之桓桓於征

于征何所于鞏于臨道阻坂長蔽虧岑窞采入其阻禽  
獮草薙申用三驅根株斷刈餘賊竄蜀遊魂猶悸西夏  
以綏賀蘭其又

脅從蚩蚩亦孔之哀寬其誅鋤予以惠來維海與勇剛  
克柔克勇也帥師為關為祓海也救民為慰為集北地  
上郡稽顙歸命如早望霓海實綏之

義威戢武奠我西陲剖蝸斲蝟人畏以懷秦民噓呵化

為謳吟殄熄暴悖克廣德仁經戰伐區蠲除租簿問孤  
弔死周匝宏溥廓我

皇恩義聲先路

帝德振振隴山既平隴流既清惟

天子之楨隴山既伏乃黔粵滇蜀敢不讐伏如翰如飛  
萬里來威

維臣之力維師之武長驅洋洋莫予云拒繫縛巨憝爭  
刳膾脯塞神人之怒黔首喁喁式歌且舞億萬斯年篤

我

皇景祐

關隴十二章二章章八句二章章九句一章十句一章十一句四章章十二句二章章十四句

南紀平閩也

閩山屹屹南紀雄藩吳越之會交廣之門維山鬼矣女其為礪矣維海汭矣女其為帶矣

山則有罷水則有蛟其物維何工為孽與妖鼓盪我藩

臣誘為唇齒以搖我疆理誰貪其餌百世之族一朝而  
圯

帝念藩臣女祖女父勲在盟府惟女孫子曷敢越乃武  
根柢之撥枝葉則病予有肺腑臣乃不克令庶邦奚正  
維鉞之興翦焉斯定

乃

命親王視師於東金節煌煌玉矢朱弓兕甲熊旂荷天  
之寵

叶充

謀夫縱縱武士充充以翼以馮共襄厥功

王師渾渾言涉於江旌旆悠悠江水不揚賊旅如林望  
風奔狂負固革心庸胥後會受彼順命殄彼衡命

三軍齊作進規退矩戰不貪誅禽不濫數會稽南部投  
戈來附仙霞之闕鳥道天插一士拒險萬夫莫越我師  
度之若履房闥

師既戾止彼亦悔止乃殽乃鯨乃匍乃匍泥首拔髮槌  
胸出血率其臣妾萃於軍茆俟龔行

天罰

天子曰咈

叶沸

繫大功之後其宥十世爾負一青予其

忍爾治忘人之過記人之功予為大君其敢不聽

昔爾有車旂今予再錫之昔爾有土宇今予再闢之非

常之恩不可數得夙夜省厥愆以懋乃績臣拜稽首承

帝命無斁

閩方為亂

帝則伐之既伐來歸

帝則活之閩亂既平閩方既定

叶庭

帝俛而思思此疲眚簡其徭征弛其青刑代虐以貞滌  
穢以清

閩民歌呼

帝為我來

叶釐

出我荼苦照我瘕瘕祝

帝之紀後天罔墜祝

帝之壽與地同久曷徒祝之心誠篤之施我後人  
世世告之

南紀十一章一章八句二章章九句四章章十

句四章章十二句

巨浸驅海寇也

巨浸稽天滔滔如何天吳罔象倚以為家

叶歌

有鯨有

鰐有鮫有鼉摧橈決帆血人於牙

叶俄

中國有

聖人爾獨揚其波

蠹彼蠹黽亦雜此處曰予勝國後誕敢紀其緒藉瑕蹈  
釁窺伺肘腋知大邦有疵載逞凶慝離間我臣僕

叶白

盜據我家室



於興於泉於汀於漳乃揚沸湯乃噪蜩蟬我有城郭倏  
為沮洳我有民人倏為僚鮒恐死須臾後來其蘇

王承

帝命建大將旂鼓我冠帶之國恐鱗介是伍我牖既綢  
我戶既繆與子偕作與子同仇悉率左右殲此羣醜  
暨暨藩臣一心一德討賊自贖不即已恤塹山堙谷馬  
騰舟駛親率其旅以臨濛汜

陛下曲赦臣臣敢不效死

將士和睦有鳧在藻既獲敵師如饑斯飽或拔其角或  
脫其距或斧其吭或截其脊賊窮見窘無地自處彼彊  
者跳我攘我逐彼弱者死我殄我戮神甚之毒鬼速其  
覆如探穀穀如振槁木匪我黷武取彼殘已足

前徒既奔兇渠束手知女上策惟有一走茫茫煙島為  
逋逃數仁無必取義不盡殺屏諸窮髮母汚我

王鉞

四州士女來迎

王旅君子維何玄黃在籩小人維何饗殮在筥于時言  
言于時語語復為

王人以耕以仕

叶語

歌

帝之德誦王之武

帝德溥將涵負吐納百谷來王天與地沓乾端坤倪太虛

包括何人不綏何物不懷何戾不蠲

叶基

何善不嘉

叶奇

皇仁熙熙云何不來

叶釐

皇帝在位受天之籙東西朔南無思不服其有不服自

膺顯戮獻馘於泮獻俘於廟武功既昭文德用紹史臣  
奏雅來哲是詔

巨浸十一章八章章十句三章章十二句

饒歌鼓吹曲

有序

徐嘉炎

臣聞蚩尤方破遂傳柷鼓之章有苗既來即上卿  
雲之頌六成八變太和之象光昭七德九功神武  
之靈赫濯選聲表盛寓物銘庸振古如茲由來尚  
矣况乎澤覆油雲征同時雨八荒四海之內共覩

颺飛一元三古而還誰方雲鶩桓桓之旅後舞前  
歌喁喁者流東征西怨謀非稽衆役僅淹時雖王  
者之師有征無戰而雷霆所擊不疾而馳殊猷偉  
伐史策之所未稱盛德大業篇章之所罕記苟非  
絃匏遞奏藉空桑絲竹之音金石相宣振路鼓雷  
鞀之響何以告成功傳後世哉夫自干戈始用書  
契以來賊子亂臣阻兵抗命豕心鷹眼之族弗率  
於古帝之朝蜂目豺聲之徒自絕於盛王之世或

竊一隅之地致稽數世之誅者蓋自昔有然矣

皇上仁育羣生厚載萬物軼漢高之大度邁藝祖之淵  
衷期杯酒以銷兵用苴茅而錫福惓懷走狗懲殖  
醢以戢韓彭永念從龍指山河而安絳灌蠹茲逆  
醜肆厥兇渠翫

兩朝帶礪之恩為千里逋逃之數叢鸛忘其豢養飽決  
枋榆桃蟲恣其拚飛毒成辛螫乃構九隆之種妄  
噓六詔之灰俗沿盤瓠幾欲奮喙吠堯地接昀町

輒思刻木叛漢爾乃茫茫殫黷潰潰沸騰蜀黔之  
破獍羣狂閩粵之鳴狐游起赤眉青犢旋開囂述  
之邪紅巾白蓮漸啓張陳之燄拔陵逆作杜洛周  
相繼稱兵侯景變生陳寶應聞風構難

皇上神謀獨運禁旅四征選士馬而如雲命公卿之惟  
月上公出鎮西府專牙宗子登壇東藩建閩雖彭  
亡歟刺將有輿尸授命之忠而張齒顏拳臣多罵  
賊捐生之烈於是軍威烜赫

廟畧深沉始平遼海北庭之畔寇身殲繼討閩山南紀  
之降王面縛虺蛇之衆次第削平鯨鱣之氛逡巡  
底定既而天厭其毒神基之謀懷恩自伏冥誅姚  
萇還為鬼殛僉汜未滅先燃董卓之躋安史雖存  
已潰祿山之腹於時邯鄲卜者假託子輿瑯琊名  
族間生處仲既繫肘而剪翼漸唇亡而齒寒然後  
躍黃龍以越洞庭驅金牛而登劍閣歌渝擊鼓西  
極三巴破竹倒戈南連五管顧乃窮猿無擇困獸



猶驚王元擁立夫隗純高尚依憑乎慶緒方舟並  
濟同惡相求據大渡之河渾忘玉斧毀盤江之索  
便謂金甌詎知葡萄江上寒水膠舟楠木溪邊溫  
泉飲馬煌煌

天語無遲參寇之師翼翼

宸衷肯緩滔天之戮北極遙頒乎

廟算南人競懼夫

天威百足死而就僵羽黨盡矣三驅前而不誠親戚畔

之爰是臨淄旦開河中夜縕沈黎摧角犇棘傾心  
洗兵於洱海之傍天清日晏習戰於昆池之側霧  
散煙消碧雞偕金馬重輝露布與雲旂竝麗昔鬼  
方尺土高宗克以三年淮蔡數城唐朔隔於二紀  
若斯之風行草偃景逸雲馳豈不神哉未之覩矣  
於焉升中

上帝告類

明堂折馘獻俘禮琮璜於

七廟振旅飲至虔珪鬯於羣神百度惟新

詔封三錢之府兆民偕樂歡騰五父之衢猗歟休哉其  
敢不肅聿自饒歌鼓吹之製始於西京樂府之章  
其後魏有繆襲之篇吳有韋昭之作傳休奕聲稱  
於晉代何承天表著於宋朝代不乏人咸稱作者  
雖移聲換調不啻蹈襲前人而譜德象功總是顯  
揚時烈颺之堂上皇然郊廟之音采之間中即是  
風謠之選

臣

嘉炎離竒蟠木空荷青黃拳曲繰絲

慙施蒼赤值千秋之異數膺三載之殊恩蟲難語  
冰馬寧識路徒事丹鉛之役終為章句之儒既未  
能飛羽檄於軍中佐陰符於幕府繫纓於苴緬之  
域勒石於點蒼之山若乃歌詠鴻名昭宣盛軌揚  
無前之偉烈附不朽於來茲臣之志也亦臣之職  
也是用不揣固陋作為鏡歌鼓吹曲一十四章選  
詞徵事因事立名非敢播之管絃聊以遺夫翰墨  
云耳

聖皇出

皇帝受命也

聖皇出披皇圖紹武烈承文謨造草昧嗣唐虞地符吐  
天苞舒神其格人所愉四海域八紘孚歌擊壤舞康衢  
邁禹跡遵堯塗蠹螫齒蹈天誅捫參井干狼弧

帝降威轟雷車斲脩蛇羅猊猱斗極拱泰階居功無加  
德有餘告太平樂于胥

右

聖皇出一章章三十句句三字

遼水奠平察哈爾之亂也

遼水紆流紫塞傍混同長白鬱相望有寇狡焉逞不祥  
罔顧懿親為

國殃師行轉戰尅大荒戎首死葬之以禮

陛下仁至義盡與天無疆

右遼水奠一章章九句句五句句七字一句三字

二句句四字一句六字

安隴右平王輔臣也

隴頭水東西流牙旗玉帳出秦州逆臣間諜陰相投頓  
令部曲尋戈矛戈矛起白日晦五嶽動百川沸始不戒  
後乃悔

天子聖仁貫汝臯罪臣愧憤頭搶地隴山永安無不利  
右安隴右一章章十四句句六句句七字八句句  
三字

豫章翻定江西賊也

豫章翻雲驚白日昏章江與貢水駭浪騰虹奔荆楚撲  
餘氛竄跡吉與袁野火縱灌莽乘風思燎原煌煌我宗  
子赫赫崇維垣鉦鼓震地軸力若排崑崙獲醜服上刑  
脅從乃無論芒角漸以消拱手奏

至尊

右豫章翻一章章十六句一句三字十五句句  
五字

掃七閩平耿精忠也



閩山丹闕水碧東望琉球天咫尺怒濤羣飛海水立有  
鳥鈎喙傍距趯攫博徒程勇啞喋思強食鼎沸三山間  
貪人還自賊妖氛塗炭浙東西彗星橫掃天南北狔子  
瘞狗真何益徒使我民不休息降王繫組親王功督臣  
撐拄東甌東吁嗟范叔真純忠

右掃七閩一章章十六句句二句句三字十句句  
七字四句句五字

海波平驅海寇鄭錦也

海波蕩漭海水渟渥維彼蛟螭為妖為孽天吳罔象跳  
盪震越二世逋誅毒痛苞蘖東南民力幾為竭

帝赫斯怒駕黿鼉為梁射箸斷鬣掃燄吞光金門廈門  
波不揚瞳瞳日出窮扶桑

右海波平一章章十五句十一句句四字三句  
句七字一句五字

平五羊討尚之信也

五羊城南接朱崖西桂林香山海門蜃氣深駛駛超母

行從禽梟子啄父毒氛侵坤維反側來相尋忘恩反噬  
昧照臨負且乘危薰心通逆書阻貢琛殲忠良冤沉沉  
誰烹魚既釜鬻金戈指白日陰貫甲馳卒成擒嶺南瘴  
開啓版宇闐闐振旅淵淵鼓勒勲紀績銘銅柱

右平五羊一章章二十二句句十三句句三字九  
句句七字

桂水深定廣西亂也

湘江南連桂水深粵西瀧岡鬱沈沈鳥飛不度獸不臨

黔陽溪流多毒淫嗟爾孤軍惟女子贅壻不臧身徒死  
國家興增如山崇說築傳巖誠國士

右桂水深一章章八句句七字

殲渠魁吳三桂伏天誅逆黨漸自解散也

渠魁倡亂脅從多滇池夜郎阻

天戈襄荆沙含毒短狐風號閩粵皆揚波念爾功微賞  
已過輒背信誓搖山河天用斬厲正厥辜鬼瞰神怒誅  
獨夫惠迪則吉從逆凶逆臣安獲邀考終

天家王鉞威無窮

廟謨符合聲應響先天弗違如指掌君不見王敦崔杼  
皆前死斲棺剝骸無漏網

右殲渠魁一章章十五句十四句句七字一句  
十字

洞庭湖平湖南郡縣也

岳陽樓洞庭水連雲蔽岡征塵起舳艫輜輶繞千里賊  
烽西自辰沅來渚宮徹夜驚戎壘雲旗獵獵下長沙蒲

帆矗水風交加賊營平地木斯拔連山白骨真如麻元  
戎奉

詔往直望無要遮朱旗絳天甲暗日流沙染血成紅霞  
廷臣拱手服

廟謨阪泉丹浦威無加

右洞庭湖一章章十六句二句句三字十二句  
句七字二句句五字

收成都平全蜀也

岷山之英為井絡萬里黃雲踰劒閣蠶叢魚鳧樹國久  
不通秦塞疆戎索後服久需聖人出先畔或因王者弱  
本朝教訖西南陞從駟朝冉存邛笮三窟覓兔營獨狡  
五丁金牛遂同惡陰平道嘉陵江桓桓將軍智畧雙水  
行陸走羣力扛勢同決帆與摧幢錦江玉壘仍我邦桂  
浦金沙月照窓

右收成都一章章十七句句十五句句七字二句

句三字

克黔陽定貴州也

羅施僻一隅，桂林篁間山。行雜苗箐路，險叢溪蠻妖。  
氛阻聲教相，率為獷頑王。師火烈烈閃，斗朱旗殷雲屯。  
紅欲野霧積，雪噴山直將。搏羆兕一往，肯驟還水西無。  
平沙修澗曲，灣灣奢安勝。國際十載師，當關何如此神。  
武俛首誰抗，顏撞歌百千聲。呼號相追攀，趨吉悔自凶。  
不若絕神姦。

右克黔陽一章章二十句句五字



定昆明誅吳世璠平全滇也

西南天末皆羈縻六師雲集風馳一隅穴鼠困闕何為  
徒析骸易子羅棲掘蟄生無時

天子明見萬里使臣詔促師期軍中發憤一鼓氣作陣  
雲杼軸深迷蠹賊內訌相危逆孽窮斃戚自伊貽脅從  
倒戈來追隨壺漿簞食迎王師奉德音赦過宥罪渙號  
弘施元戎十乘惟騏捷書露奏京畿八荒震疊

天威

聖皇至德如斯惟永清垂拱穆穆無為

右定昆明一章章二十三句四句句七字十一  
句句六字六句句四字一句十二字一句五字  
文德舞告成功也

穆穆無為照臨下土奏武功歌為文德舞敷天與率土  
頽首皆來庭際會欣六合望風仰太清二儀同造化地  
平而天成風雲與時感日月同其榮羣臣咸在列濟濟  
多頌聲

聖皇惟乾乾夙夜敢荒寧孝治奉

兩宮謙冲德不盈至誠感穹蒼爰以致太平祇承文命  
謨思日庭堅贊永懷舜日億長侍堯年萬

右文德舞一章章二十四句句四句句四字二十  
句句五字

皇清文頴卷五十一

欽定四庫全書薈要卷一萬九千四百五十三

集部

皇清文頴卷五十二

詩

樂府

平滇饒歌十章

有序

袁佑

皇清丕膺

天祚

祖

宗邁厥德肇造區夏我

世祖章皇帝蕩蕩則

天烈踰三后奄有滇疆至于三危罔不臣服

皇帝聖冲踐位乃吏治之伏惟

皇帝陛下執中廣運睿聖文武綏和庶邦臻於至理滇

逆三桂作藩於斯罔承

聖化部伍繁有徒匱竭

天庾民罷財賦

皇帝恤民依

詔俾班師輯其徒旅民勞用息肩逆故昏克輒干大刑  
賊我民人叛我疆域誘其類狂毒肆劫

皇帝命出師錫鉞彰

天討彤弓金節虎旅祁祁徃必克我人如望雨

皇帝曰咨

天

祖之威不敢弛火炎於崑焚厥玉予一人弗忍緩乃師

許其自悔禍既弗悛

帝赫斯怒秘畧神斷秦閩粵東西湖湘湯湯蜀黔絕險  
悉以平逆桂陰伏誅其黨提其遺孽世璠走閉昆  
明我師合圍貝子臣章泰實總軍

皇帝曰爾泰統我六師惟我文武卿士在軍張厥撻伐  
以衽席我赤子除克務盡克有賞稽我師者罰弗  
宥朕承

天



祖子民夙夜祇懼爾祖征是力泰拜稽首受

命進師破其城南關據高俯城中困獸弗敢窺逆黨以  
矢射我軍乞降反戈攻世璠斃之偽將相並授首  
捷

聞臣庶歡舞誕被萬國昆蟲草木靡弗向榮用昭對於  
郊廟

天

祖來歆雨雪惟時

太皇太后

皇太后樂豫壽愷家國天下時雍光被振古未有廷臣  
揚盛美僉上言議加

尊號

皇帝讓弗遑曰惟茲薄海方寧民困待蘇予一人厯如  
傷發令施仁尚其懋勤弗怠皇敢自矜於惟

聖德神武化協

高厚雖堯舜蔑加焉史臣執簡宜倣尚書大雅宣昭

休問示於來茲

臣

愚弗勝乃為平滇之歌十章恭獻

黼戔夫黑水三崇之山陶唐氏之荒域其水倒流曰滇  
故其地臣叛不恒自漢唐來代有僭據足徵已

皇帝一麾平之六詔九隆革心悅服黑雉白雉來賓

聖子哲孫永隸圖貢賈乎上哉

臣

謹稽首頓首以詠我

皇帝昭清之駿烈

聖同

天 第一章

聖同

天德誕脩河洛瑞錫之疇統系承精一求垂藻火子方  
區臣民洽敷政優嘉禾出肉角遊及河獄懷且柔狡逆  
命

天所雙言殲厥渠猶穿窬喜起廢擊壤謳永  
天眷萬億秋

出師初

第二章

聖衷亦云勞儉玉食宵衣而朝憂吾民之憂民樂陶陶

萬幾率作股肱有變臯不震動聲以色典學羅俊髦敷  
文舞兩階格有苗不忍遽誅緩師撫以招八年惡不悛  
天威用昭

皇矣 第三章

皇矣文德赫武功削平巴蜀黔粵通桓桓大畧運掌中  
賊衆潰北級如墉圍城退閉智力窮飛勅宵出甘泉宮  
霆發電掃祖三宗六師旄旌捲朔風賊臣倒戈誅元兇  
髣人濮人何喁喁椎結耕田樂年豐自西自南車書同

於爍 第四章

於爍

王師我

皇匪黷武蒟醬叩竹那足求弄棟櫟榆

皇祖手闢之疆土賊臣竊據之焚溺我人寧不綏我士  
女赫赫禁旅我

皇發縱得所一當十百況如雲雨我

皇受祜于

天廓清六合乃穆穆揮絃而御六合無一頑丕承我  
皇祖

民畝 第五章

民畝稅不增軍實亦不寡我

皇如神邁虞夏定紀經章風雅德彌盛威靡假勤遠制  
勝靖原野嗟爾孽險何為者恃險空設師如虎縹碧之  
鷄金精之神馬我師相羊於其上我師鼓歌於其下

昔夜郎 第六章

逆昔戍夜郎耗

國糜糗糧羣黎膏與血飽飮豺與狼谿壑不可厭輸將  
亦孔傷我

皇軫民物措施各有方師還民休息詎不均

恩光賊夙懷異謀脅衆滋鴟張短狐何依附連鷄何飛  
揚賴我

聖人平遐荒

萬方平

第七章



萬方平瀾滄濁水清冉駝白馬內附敢閉雋昆明我  
師仗

廟畧立墉點蒼下瞰城炙鼠拔草食暴殄金銀寶玉昔  
何驕盈亂賊誅無赦舉宗就天刑身毒之國咸謂中朝  
有

聖人朝有

聖人蕩蕩慈嶺間貫胸交跡稽首胥來賓胥來賓我

皇慈仁綿綿無期民質風俗醇內咸一德佐外皆慕義

臣逆命褫其魄服威神普天之下莫敢不尊親

於都 第八章

於都我

皇之功虎臣赳赳戮力於疆場

帝曰俞臣拜稽首我

皇之廟謨臣其供奔走之我

皇

皇不有維我

兩宮大德至仁

太皇之

聖母我

皇孝思悅

聖母之心長生永壽告於

天地獄瀆

皇祖式臨之

神其默相左右我

皇偃厥武福祿是受

審天心 第九章

凡茲臣庶上當審天心彼冥不知畏僭於衡

天大震雷以風雨淫淫雷震擊其梁棟折其楠天鑒有  
赫我

皇德具備函載高深聲教訖朔南彼逆之徒空如林卒  
艾除之如獵短獸如弋禽青蛉畷町之域我

皇永照臨

山石 第十章

山石何磬磬河有流波安瀾光被四極百爾彈其冠  
嗶嗶辟雍鼓鐘士翱翔於類罔不歡我師樂室家弣弓脫  
馬鞍農夫橫經而未蠲額除煩和風習習雨霏霏園扉  
草青青徹其垣澤及蟲魚鳥獸般濯濯來奔禮樂興  
靈時嘉壇功德盛未有乃聖神武文櫓槍落紛紛

前星輝

紫微端

聖人有子重喬雲振振膚且詰我

皇貽燕後昆億世海寓乂安

東巡雅十三章

徐元文

上帝臨鑒貺我

皇清我

皇秉聖

三后適成克誠九區交暢六英美哉

皇度翼翼明明

一章

維歲甲子冬日載融

皇時省方屆於大東

鸞輅震野芝旂翳空清濟漸車靈嶽望風

二章

我我靈嶽表鎮曰岱馳走百神苞并萬態陋彼升封虞  
柴是配登覽雲物鬱何靄靄

三章

洪河決漭長江蕩濇

龍艦星移及吳之域惠彼小民湛我

皇德還

御六虬袞服是即

四章

陪尾之陽四源交瀉水哉水哉不舍晝夜

皇過川上神契元化瞻望闕里僕臣趨駕

五章

麟蹤既邈鳳德何長教澤弘衍翊我

聖皇萬乘至止夫子之鄉章縫迎路簪黻升堂

六章

於赫夫子濯濯厥靈肅將苾苾祀事孔明鬱鬯龍勺象

彛犧尊八音克諧羣后駿奔

七章

寢宮轍轍夫子所憇



皇陟於庭探索琴佩芳颺猗蘭青浮鐵檜見於羹墻其  
容有睟

八章

防阜之林百頃交陰異國珍產蔚為同岑文楷輪囷以  
杖以構擘其叢著穆哉

皇心

九章

穆哉

皇心更

御雕几爰

命毓圻秩爾孫子肆列俎筵進講以次遺經再展

皇心燕喜

十章

皇錫毓圻錦衣貂裘庭列曲蓋以饗春秋毓圻稽首

天子萬壽

皇詔毓圻保艾爾後

十一章

東野支封禽父是宗錫之冠帶以康周公兩聖作師文

其在茲敷儒闡道千載一時

十二章

惟星則煌惟雲則爛

聖藻光輝輝於天漢懋建有極登道之岸昭示萬邦如

日斯旦

十三  
章

聖武雅三篇

有序并上表

陳廷敬

伏見我

皇上撫御萬方盡有四海內外

恩德鴻龐聲教遐暨比年以來天下宴安而推溯武功

所由戡定則誅三逆以平滇黔粵閩楚蜀外闢察

哈爾臺灣倭囉斯喀爾喀之地幅員之廣超越前

古治化之隆巍巍莫並今

神謨獨斷

聖武布昭伐罪救民

躬行天討大憝授首餘黨歸誠厄魯特全國蕩平捷書  
至日雷動嵩呼中外臣士問巷小民罔不歡忻忭  
慶蓋是時

車駕親征馳驅戎壘凡三出朔塞矣當

天衷決策初御六師中朝悚慄僚庶攀留臣以年力就

衰蒙

恩矜憐弗允扈從之請自是以來祇遵成

命不敢再瀆

天慈而違離

聖顏日益虔惕伏念

皇上為天下掃除殘賊為邊疆永致廓清跋歷窮荒經  
涉寒暑勤勞軍務旰食宵興而臣子安居畧無寸  
效今已無事言念

國恩無所稱報猶欲俯竭愚誠撰擬文句敬颺

聖烈傳之無窮而

臣

媿鄙無學尋繹累日莫知所擇竊

惟自古帝王有功於天下其名聲彰著於後世者  
方策之所紀載金石之所刊錄聲詩之所流傳後  
之人攬其事而遐想其盛焉是以昭昭然若昨日  
事也然而其盛者亦不數數觀矣阪泉涿鹿以還  
古今稱善用兵者漢之高帝唐之太宗皆自興事  
之始乘時構會底於成功若我

皇上聖德而踐天位躬居大寶志切生民仁育羣倫義  
征不諱尊臨九重制勝萬里

天威所至攻戰多方撲滅克殘蕩掃巢窟宿寇遺孽一  
朝頓除伏卅載之逋誅樹九邊之壯觀殲其渠魁  
降其支黨燧烽永息亭堠不施曠古難平之部落  
盡為臣僕普天所有之土宇咸入版圖自此震海  
清平兆民樂業集萬年之鴻慶成千古之大功臣

仰窺

聖烈俯稽往古漢祖唐宗起於側陋角一時之雄乘末  
流之敝雖精於兵事而我

皇上文謨武烈聖德神功實遠邁前徽矣若夫書冊所  
載既有天下優游宮禁之中不過遣將興師身居  
其逸坐收其效即間有親征如宋藝祖之北伐明  
成祖之行遼宋則失利明則鮮功是以方策金石  
聲詩之文彷彿擬比可導揚盛美之萬一者蓋徬  
徨震悼而莫知所擇焉求之於詩惟周宣王身為



天子南征北伐有定天下之功雖淮夷諸小敵未  
為甚難平之寇而獫狁之伐止於太原皆命臣士  
以行事蹟殊不類然其臣詠歌之詞孔子有取焉  
唐臣柳宗元本其義作唐雅臣於嚮者滇逆之平  
不度固陋竊取其義進平滇雅曾上塵

聖覽今臣伏思後世鐃歌鼓吹之曲未足以盡  
聖武之形容仍依古體謹撰

大駕三臨沙漠親平僭逆

聖武雅三篇繕錄以進臣之愚意固以敷宣人事之盛  
美而其義則歸本於天我

皇上即天也覆載照臨雷霆風雨天之所以為道栽培  
傾覆治亂侮亡

皇上之所以為功彼噶爾丹自外於覆載照臨之內干  
雷霆之誅絕風雨之澤蓋所謂逆天者亡也我

皇上天威所臨賊始則沙場糜敗妻孥磔屠繼則衆叛  
親離孤雛就縛其卒也我

皇上親揮將士迫抵賊巢賊知逆天必誅飲藥自殺  
遁始訖終我

皇上馳驅萬里勞苦艱難若非

親征大舉必不克迅致膚功此人事也即天也至若晴  
暘以時靈泉表異水草應候百神致祥旋師之先  
甘雨灑郊飲至之日雲陰開霽臣僚擁道恭迎都  
人父老孺子瓣香欣躍愜樂慶成臣推本於天之  
義由茲益自信焉臣不任榮幸歡忭之至

惟天初臨沙漠安邊靖寇破敵大捷行慶於民振  
旅還京武功盛也

惟天惟

帝惟

帝乃天盡天所覆我徼我邊何彼逆鷺為我人患

帝自伐之往取其殘

一章

衆曰

至尊毋勞

萬乘我師武臣孰不恭命

帝曰吁哉自昔弔民如水斯溺如火斯焚

二章

帝謂卿士朕必親往彼惡貫盈煽虐滋廣搏其腹心離其支黨安我荒服除彼狙獷

三章

諏春吉日是類是宜

聖謨先定叶於神祇既攻我車既秣我馬峙我糗糧於

塞之下

四章

六龍遙飛闕雲四開師行如山如霆如雷蠲租已賦民

有慶哉屬國謹呀

天子自來

五章

茫茫荒磧伐薪孔遐濕烟不爨萬竈以譁我軍之行晴  
空洋洋雨師避道宜暘而暘

六章

帝減尚食哺我士飢飲我士渴朝斯暮斯野曠無水何  
以為糜玉鞭所指靈泉瀾瀾

七章

無人之鄉絕轡之野五日窮追賊衆解瓦彼狂何知游  
魂暫假不謂

帝來初猶笑啞

八章

寇昏以驚聞

帝自將獸窮突奔心膽墮喪軍扼於途大殲巨創瀚海

塵揚天山簸蕩

九章

策顛於丘波血於河九州百蠻為鑒孔多燕然之山蒼  
崖嗟我伐石紀功萬載不磨

十章

都人黃耆扶携來迎饒吹所歌告武之成桑麻在郊民  
熙以耕戎衣一著四海永清

十一章

惟天十有一章章八句

皇矣再臨沙漠相機宜撫降人安兵民武功再盛也

皇矣

聖功邊氓孔安惟

帝念茲冀即於完自我來歸由暑迄寒旅師在野雨雪

其漫

一章

天初生民豈擇莠良



帝德好生并包八荒從化者存不龔者亡汝尚能來無  
或汝戕二章

汝家靡矣汝徒娶矣羈孤單棲云何嬉矣汝尚能來食  
之衣之天無不幬地無不持三章

怙終者誅國有明紀彼頑不悛盜我儲峙師進逐之原  
野萬里皆我職方何奔何止四章

皇命於廷是礪是攻拔本塞亂惟義之中朕不親往邊  
人斃斃我怙我恃宣憚征行五章

朔風蕭蕭捲我旆旃翠華載臨儼涉我郊藩落老稚簞  
壺以勞

帝來撫我於險於遙

六章

或擁道周或控馬首

帝顏霽溫下拊以手如燠如春

恩語勤厚坐使來前薄饗其有

七章

言幸師營言迫賊壘烜赫

天聲賊黨破徙其降如歸其趨如市來者既多惟恐後

至八章

帝待降人曰彼大辜汝則何罪罹彼毒荼致汝於鋒致  
汝于屠其來汝拔爰止爰居

九章

帝謂降人我黎我赤草枯于原冰堅于磧藹藹陽和于  
疆于陌盡降其人大醜斯獲

十章

我士我旅歲其云遷

帝念我人言歸言旋凱聲載路士女闐闐

帝威

帝德振古無前

十一  
章

皇矣十有一章章八句

武成三臨沙漠禽其孽子殲其渠克餘黨歸命武  
功大成也

武成自初三援天戈惟

皇之命神人以和長彼蝱螟奈此嘉禾既化其類胥顛

其窠

一章

載被載嚴式張我武雲旗飄翩日繞熊虎風颭烈烈揚

於金鼓旅矢朱弓不殊干羽

二章

皇眷西土我理我疆於闕於塞於邊之墻於隴於畝於河之陽下民何幸近

天子光

三章

皇撫吾民以覆以載是幸是臨恩逾汪濊

帝來人歡

帝行人思六師所過言錫我釐

四章

帝行天中如日正車咨遣兩師以翼漠沙尅日並進毋

謂遠遐角之犄之

天威所加

五章

爰陟爰止狼居胥山四顧藩部於川於原皆我在宥矜  
茲彈丸如毒斯螫如爪斯蹇

六章

彼臬日蹙孤雛棲棲我禽獮之檻致於畿人之無良不  
保妻子惟汝之為求禍自爾

七章

我師日進言迫其巢卵傾翼折臬困以啤腊斯焚斯不  
復遠跳乃如之賊為戒茲昭

八章

戮尸于軍傳首于邊變容慄股孰敢不虔

皇赫斯怒遠人所觀如礪如帶如石之磐

九章

載馳載旋言歸凱樂於以慶成於

郊於

廟載沛

德音四方是告

帝開明堂萬邦畢照

十章

惟天同符以清以寧自此無事泰階永平惟

帝之功與天無極斯歲斯年於萬於億

十一  
章

武成十有一章章八句

皇清文頴卷五十二





總校官庶吉士臣張能照

校對官檢討臣王鍾健

謄錄監生臣李青標